

## NAQQIUT

Inatsisartut inatsisissaattut siunnersuut 12. august 2016 ullulerneqartoq taarsissavaa

*(Inatsisissatut siunnersuutip kalaallisoortaani ataasiakkaanik naqqiisoqarpoq kiisalu kalaallisut qulequtaa allanngortinneqarluni. Inatsisissatut siunnersuummi § 1, imm. 3, allanngortinneqarpoq aalajangiunnarlugu, pinngitsoorani soraarnerussutisiaqarnissamut aaqqissuussineq aningaaseriviit ilaanni pilersinneqarsinnaasoq. Naggataatigut inatsisissatut siunnersuummi § 4-mi allannguuteqartoqarpoq, inatsimmut atuuttumut innersuussinerit eqqortut ilanngunneqarlutik)*

**Uunga siunnersuut: Soraarnerussutisiaqarnissamut aaqqissuussinermut pinngitsoorani ilaanissaq pillugu Inatsisartut inatsisaat nr. xx, xx 2016-imeersoq**

(Aningaasaqarnermut Aatsitassanullu Naalakkersuisoq)

**Saqqummiussissut**

(Aningaasaqarnermut Aatsitassanullu Naalakkersuisoq)

**Siullermeerneqarnera**

Matumuuna Naalakkersuisut sinnerlugit Soraarnerussutisiaqarnissamut aaqqissuussinermut pinngitsoorani ilaanissaq pillugu Inatsisartut inatsisissaattut siunnersuut saqqummiutissavara.

Ullumikkut utoqqalinersiutit saniatigut inuiaqatigiinni akuuffigisatsinni soraarnerussutisinissamut aaqqissuussanik pigisaqanngitsut amerlaqaat. Siunnersuummik matuminnga tamatuma allanngortinnissaa Naalakkersuisut kissaatigaat. Soraarnerussutisiaqalertussat inuunerminni atugarisaasa pitsaasuunissaata qularnaarnissaat Naalakkersuisunut suliaavoq ilungersuussa. Taamaalillutik siunissami soraarnerussutisiaqalersussat ulluinnarni inuunerminni pitsaanerusemik aningaasaqarnerminni tunngavigisassamik qulakkeernissaat Naalakkersuisut pingaartuutillugu isigaat, siunnersuutillu saqqummiussap anguniagaq tamanna siuarsarpaa, siunnersuut aamma siunissami soraarnerussutisiaqalersussat imminnermik pilersugarinissaannik tapersersueqataammat. Siunissami soraarnerussutisiaqalersussat taamatut iliuuseqarnikkut namminneq aningaasaqarnermikkut tunngavigisaminnik ilapittuuteqarsimanertik iluarisimaassagaat Naalakkersuisut isumaqarput.

Siunnersuummut tunngavigisat Akileraartarnermut Atugarissaarnermullu

Ataatsimiititaliarsuarmit aamma imminek pilersugarinerup pingaarutilittut ilaatinneqarfiani aaqqissuusseqqinnermi sammiviit sisamaat malillugu Naalakkersuisut Attassisinnaanermut Siuariartortitsinissamullu Pilersaarutaanit innersuussutaasunit tunngaveqarput.

Tigussaanagerusutullu nammineq utoqqalinissamut sipaaruteqarnerup kajungernartuunissaanik isummamut utoqqalinersiuteqarnermik aaqqissuussamut amerlanerussuteqarfiusumi, 2015-imi

ukiakkut ataatsimiinnermi tunngavigisatut allannguutit tunngavigisassallu siunnersuutip tunngavigeqqippai. Aamma pisortat aningaasaqarnerisa piffissamut ungasissumut attassinnaanera siunnersuutip tapersersorpaa.

Nunanut nalinginnaasumik immitsinnut assersuuttakkatsinnut assersuussaqaarutta tamakkiisumik soraarnerussutisinissamut sipaagarisagut tamatigoortumik appasippallaarput. 2013-imi soraarnerussutisianut sipaarutigisanik innuttaasut 400 millionit koruunit ataatilaarlugit akiliutigaa. Naalagaaffitta isertitaasa tamarmiusut 2 procentiisa assigaat. Nunanut, soorlu Danmarkimut, Savalimmiunut Islandimullu naleqqiullugu malunnartumik appasinneruvoq. Nunani taakkunani pineqartuni naalagaaffiit isertitaasa tamarmiusunit 2013-imi akiliutaasut tassaapput 6 procentit, 8 procentit aamma 6 procentit.

Innuttaasuni allannguutit, tassalu ukiut takkuttussat ingerlaneranni ikiliartuinnartunit amerliartuinnartut pilersugarineqarfissaasa maannakkut iliuuseqarnissatsinnik pisariaqartitsineq pilersippaat, taamaalilluta piffissamut ungasissumut unammillerfissat annikillisassagatsigit.

Inatsisissatut siunnersuut naatsumik oqaatigalugu imatut paasineqassaaq, inuit tamarmik 18-inik ukioqalersimasut aamma Kalaallit Nunaannut tamakkiisumik akileraartussaasut soraarnerussutisianik aaqqissuussamut akiliuteqartarnissaat. Taamaattorli ukiumut 100.000 koruunit inorlugit isertitalittut inuit soraarnerussutisianik aaqqissuussamut akiliuteqarnissamut pisussaaffimmuut ilaassannginnerat siunnersuutip kaammattuutigaa. Inuit ukiumut 100.000 aamma 150.000 koruunit akornanni isertitaqartut soraarnerussutisianut aaqqissuussamut akiliuteqartassapput, taamaattorli innunut ukiumoortumik 150.000 koruunit sinnerlugit isertitaqartunut naleqqiullutik annikinnerusunik akiliisassallutik. Taamaalilluni innuttaasut nalinginnarmik aningaasanik atorsinnaasaannut tunngasunik siunnersuut sunniuteqarfeqarpoq, innunnulli ataasiakkaanut ullumikkut siunnersuutip aningaasaqarnikkut sunniutaata aamma piffissamut ungasissumut ilorraap tungaanut sunniutit akornanni naammaginartumik oqimaaqatigiissummik nassaarniartoqarsimavoq.

Inuup isertitai naatsorsorneqaraangata isumaginninnermi akiliutit, soorlu ineqarnermut tapiissutit, sioqqutsisumik soraarnerussutisiaqalernerit, akilersuutit il.il. ilanngunneqartassanngillat.

Tassunga ataqatillugu inatsisissatut siunnersuutip ilaatigut innunut soraarnerussutisianut aaqqissuussamik peqanngereersunut, ilaatigullu 100.000 koruunit sinnerlugit isertitaqartunut taamaallaat sammisuunera erseqqissaatigissavara.

Innuttaasut sulisitsisullu pinngitsooratik akiliuteqartarnerisa nakkutiginnissaat akileraartarnermut aqutsisoqarfiup suliassaraa. Innuttaasoq soraarnerussutisianut aaqqissuussamut akiliuteqanngippat pineqartumut soraarnerussutisianut aaqqissuussamik pisariaqassappat aallartisarnissaa akileraartarnermut aqutsisoqarfiup isumagissavaa.

Naggataatigut inatsisissatut siunnersuummut tassungalu oqaaseqaatinut innersuutissavassi.

Taamatut oqaaseqarlunga Naalackersuisut sinnerlugit siunnersuutip Inatsisartunit oqallisigineqarnissanut tunniuppara.